

樂律典第三十六卷

樂律總部彙考三十六

皇清樂章

元旦節朝賀

皇帝陞座中和韶樂作奏元平之章

於穆

元后敬授人時四始和令三陽肇基鸞路蒼龍載青其旗迎氣布德百工允釐行慶施惠及我烝黎
皇帝還宮中和韶樂作奏和平之章

有奕元會

天子穆穆躋躋羣公至自九服正朔所加海外臣僕率土懷惠萬民子育千齡億祀永綏蕃祿

諸王百官行禮丹陛大樂作奏慶平之章

皇覆萬宇品物咸亨九賓在列百譯輸誠濟濟卿士式造在廷

帝仁如天

帝明如日親賢任能愛民育物禮備樂成聲教四訖

外藩行禮丹陛大樂作奏治平之章

天盡所覆以昇我

清我德配命涵濡羣生萬國蹈舞來享來庭俱俱蹲蹲視彼干戚

天威式臨其儀不忒

冬至朝賀

皇帝陞座中和韶樂作奏遂平之章

乾符在握道轉鴻鈞天心見復物始資元景長舜日紀協堯春玉琯應瑞寶曆肇新衆正在位
輔翼

一人

皇帝還宮中和韶樂作奏允平之章

萬國在宥一陽斯溥淵默臨朝天職修舉君子道長駢珪聯組占日書雲產祥降嘏宜暘而陽
宜雨而雨

萬壽節朝賀

皇帝陞座中和韶樂作奏乾平之章

二儀清寧三辰順則維

帝凝命函冒區域仁恩廣覃至於動植允道化成隆功駿德

聖人多壽年世萬億

皇帝還宮中和韶樂作奏太平之章

鑒觀惟德丕命惟

皇肇茲壽域薄海要荒物性茂育民俗樂康冠帶之國望斗辨方曰惟萬年同於昊蒼

元宵節

皇帝小宴陞座丹陛大樂作奏協平之章

聖皇蒞止穆穆皇皇百爾卿士章服斯光吹笙鼓琴式燕嘉賓萬福既同歸美

一人

皇帝小宴還宮丹陛大樂作奏興平之章

湛湛露零維豐之芑猗歟在公思皇多士宴示慈惠以洽百禮敬慎威儀福祿來只

太皇太后聖旦

太皇太后陞座中和韶樂作奏升平之章

嘉樂

聖母慈徽穆穆協德坤元以涵以育以天下養永綏天祿

皇情展慶禮明樂淑億萬斯年受茲介福

太皇太后還宮中和韶樂作奏恆平之章

天祐

皇家景命浚申宮闈重慶繁祉川臻如南山壽集嘏斯純我

皇樂只燕及臣民薄海內外罔不尊親

太皇太后宮行禮時丹陛大樂作奏晉平之章

彤庭景麗旭日祥風繽紛綵仗奕奕璇宮

鴻慈燕喜歡洽

聖衷萬方一軌來賀來同千官拜舞樂胥有融維壽維祺天地竝隆

皇太后聖旦

皇太后陞座丹陛樂作奏豫平之章

有懿

慈闈惟天下母厚德之符合弘九有式嗣徽音以昌厥後寵綏受之遐不單厚福祿來求如山如阜
皇太后宮行禮丹陛樂作奏益平之章

品物咸亨景光清泰展禮孔偕式瞻嘉會金石相宣貫珠編貝思媚思齊

德音四沛以介繁禧萬年保艾曰壽而臧曰昌而大

皇太后還宮丹陛樂作奏履平之章

百禮既洽燦然其章瑞雲承輦麗日舒長萬方玉食怡愉未央言旋彤幄凝祉儲祥
一人有慶萬壽無疆

皇后千秋令節

皇后陞座丹陛樂作奏淑平之章

乾資於坤儷尊

宸極王化攸宜母儀萬國履順含章茂明內德福履永綏迺燕迺翼

皇后宮行禮丹陛樂作奏正平之章

采章有蔚禮備樂宣

令儀令德率履無愆型家而國實惟承

乾既淑且和景福綿綿

皇后還宮丹陛樂作奏順平之章

椒宮奕奕陰教修明禕衣有耀環珮和鳴禮容孔恪萬福來成關雎之德流美風聲

闕丘樂章

迎神樂奏始平之章

敬承純祐兮於昭有融時維永清兮四海攸同輪忱元祀兮從律調風穆將景福兮乃眷微躬
淵思高厚兮懇負鴻則聿章彝序兮夙夜宣通雲輶鸞輅兮忽降中壇翠旗紛裊兮列缺豐隆
肅始和暢兮慶洽陶匏百靈祇衛兮齊明辟公恭仰顯穹兮神來燕喜協昭慈惠兮遯鑒予衷
奠玉帛樂奏景平之章

靈旗爰止兮奉玉筵執事有恪兮駿奔前有美珪璧兮薦縞織經緯獲理兮耀琇璉來格洋洋
兮思儼然孔忱翼翼兮告中虔

進俎樂奏咸平之章

昇香珍錯兮列豆饔吉饌爲饒兮格乾闥九州美味兮薦膏鮮特牲潔敬兮苾芳筵願垂降鑒
兮駐雲輶錫嘉福兮億萬斯年

初獻樂奏壽平之章

玉卺肅陳兮明光桂漿初醕兮信芳臣心迪惠兮捧觴醴齊載德兮馨香靈慈徽眷兮喬皇勤
仰止兮斯徇徕

亞獻樂奏嘉平之章

考鐘拂舞兮再進瑤觴翼翼昭事兮次第肅將睟顏容與兮蒼几輝煌穆穆居歆兮和氣洋洋
生民望澤兮仰睨玉房榮泉瑞露兮慶無疆

終獻樂奏雍平之章

終獻兮玉卺清肅和鬯兮薦微誠聲管鏘鏘兮協氣升盈盈旨酒兮勿替思成尙其醉止兮懷
嘉生八龍蜿蜒兮苞羽和鳴

徹饌樂奏熙平之章

盟薦畢兮精白申虔燕娛兮勞帝神百辟肅雍兮傾樽尊福施下逮兮宜祐人民

送神樂奏太平之章

嘉德夙成兮崦嵫壇場穆思廻盼兮雲駕洋洋山河日月兮朗曜崇深青龍按節兮白虎低昂
洪鈞滌蕩兮妖孽潛消我求時惠兮感恩馨香鳴玉鏘金兮肅若有望紫壇嶽鑿兮赫赫煌煌
臣乘寶曆兮載須我輔願蒙博產兮河岳鍾良天施地育兮不可殫究殖我嘉師兮沐浴休光
望燎樂奏安平之章

雷車電邁兮飛達揚有虔秉火兮炳越芳繁會賁鏞兮奮龍旗俾爾昌熾兮降蕭光烝民歌福
兮富壽康予獲疇祉兮萬億斯皇

皇帝

郊祀還宮導迎樂作奏祐平之章

皇天有命

列聖承之我

后配德文匡武綏海隅靈謚神靈宴娛於萬斯年流慶降釐

方澤樂章

迎神樂奏中平之章

吉蠲兮玉宇開薰風兮自南來鳳馭紛兮後先岳瀆藹兮徘徊肅展禮兮報功沛靈澤兮九垓
奠玉帛樂奏廣平之章

神州吉土兮中壇總我郊時兮孔嚴辟公趨蹌兮潔蠲耆鐘伐鼓兮肆筵黃琮織縞兮陳列靈
光下燭兮誠惓宣

進俎樂奏咸平之章

玉俎金奏兮未央嘉餼有踐兮大房牲牷告歆兮惟恪民力普存兮肅將厚載資生兮無外几
筵俯鑒兮洋洋

初獻樂奏壽平之章

匏尊泛齊兮朝踐揚博碩升庖兮鼎方清風穆穆兮靈旗張神明和樂兮舉初觴洽百禮兮禋
祀罄九土兮豐稷

亞獻樂奏安平之章

江郊兮縮聚山疊雲霽兮馨香介黍稷兮芳旨再展微誠兮趨踰樂成八變兮樂只儼皇祇兮
悅康

終獻樂奏時平之章

方壇兮豐薦盈旨酒思柔兮中和平陟降從容兮駐雲輶禮成三獻兮捧玉觥含弘光大兮德
厚靈祐丕基兮永清

徹饌樂奏貞平之章

樽俎畢兮誠未虧黃琮告徹兮儀景暉晏陰定兮邀靈錫南訛秩兮奏薰時肅惟昭明兮孔邇
覃博厚兮載羣黎

送神樂奏寧平之章

望塵同

靈旗兮雲際屯飛龍兮逝駸駸陰儀粹兮德純眷四海兮無塵配皇穹兮化宣綏百祿兮烝民

朝日壇樂章

迎神樂奏寅曦之章

於昭兮旭輪浴虞淵兮初升春已融兮交泰循典禮兮惟馨炳蕭艾兮祇肅神其聽兮和平
奠玉帛樂奏朝曦之章

神來格兮太乙東統萬國兮玉帛同肅將享兮承筐篚盟以薦兮孚有願
初獻樂奏清曦之章

御景風兮神式臨酌清醑兮椒其馨爵方舉兮歌且舞憑龍勺兮吹鳳笙
亞獻樂奏咸曦之章

再舉奠兮鬱金香嘉樂合兮舞洋洋神飲食兮意徜徉容貌舒兮和以康
終獻樂奏純曦之章

式禮未竭兮還升終以告虔兮醑醑願神且留兮鑒茹以侑以勸兮至誠
徹饌樂奏延曦之章

儀既成兮物已饗神欲起兮運靈爽徹不敢遲兮慎趨踰照臨下土兮常朗朗
送神樂奏歸曦之章

雲車征兮風馬翔驅馳千仞兮臨萬方再拜手兮稱送神振轡兮當陽中天麗兮徹隱普天戴
兮恩光敷和煦兮成物錫萬寶兮永康報神功兮時享祈神佑兮悠久無疆

夕月壇樂章

迎神樂奏迎光之章

猗歟太陰兮御望舒式遵九道兮游清虛駕冰輪兮行西陸今之夕兮來享予

奠玉帛初獻樂奏升光之章

有來雍雍幣帛在陳琮璜以嘉明德惟馨式舉黃流兮挹犧尊饗豆靜嘉兮香核芬

亞獻樂奏瑤光之章

二齊載升維以告虔歌管鏗鏘奉神之懽荷亙古兮麗天挹清光兮几筵

終獻樂奏瑞光之章

一敬畢申三舉願酬誠信潔齊天下有道鼓鐘簡兮聲容竝茂象大德兮厥光皓皓

徹饌樂奏函光之章

其香既歆對越告成徹爾登豆敬受駿奔神悅懌兮意欣欣予翼慎兮安以寧

送神樂奏保光之章

駕彩霞兮驂景星御和風兮躡慶雲神欲起兮不再停瞻天衢兮拜雲程影踰躔兮光澄清饗予祀兮意慇懃予所祝兮世太平偃武修文兮萬世長春

祈穀壇樂章

迎

帝神樂奏中平之章

惟

帝勤民兮求莫匪舒小民何依兮黍稷與與元日有事兮百辟趨爲民請命兮食咸需遙瞻龍駕兮歷紫虛日臨黃道兮東風徐臣深昭事兮遄寧居願垂嘉惠兮大有書

奠玉帛樂奏肅平之章

民天惟食兮農事先粒我烝民兮有大田風靈流形兮雨澤霑實穎實粟兮氣化全玉帛祇奏

兮禋祀虔仰祈寶宇兮享豐年

進俎樂奏咸平之章

鼎烹兮苾芬嘉薦兮無文奉雕俎兮大武壇繡達兮氣干雲昭普存兮民力惟明德兮馨聞

初獻樂奏壽平之章

初獻兮旨酒盈著誠致潔兮犧尊盛儼對越兮在上惟昭明兮有融瑟黃流兮玉瓚帝心歆假

兮資嘉禎

亞獻樂奏景平之章

著尊啟兮告虔清酌次第兮舉前禮再獻兮肅拜列瑤觴兮秩斯筵神悅懌兮如在惠我嘉生

兮福便便

終獻樂奏永平之章

終獻兮泰尊移苾芬嘉旨兮圭瓚交馳神既醉兮錫祉禮成于三兮陳詞願灑餘瀝兮沐羣

黎臣拜手兮望雲霓

古今圖書集成
徹饌樂奏凝平之章

俎豆具陳兮庶品齊舉荷昭鑒兮靡或遺饌告徹兮玉几登歌洋溢兮式禮無違肅微忱兮告終事

上帝居歆兮錫鈍福

送

帝神樂奏清平之章

祇奉

天威兮弗敢康小心翼翼兮昭穹蒼雲垂九天兮露瀼瀼翠旗羽節兮歸何鄉臣拜下風兮意徬徨願沛汪澤兮時其雨暘

望燎樂奏太平之章

翹首兮天闕邈彼雲海兮何蒼茫炳蕭束帛兮薦馨香精誠感格兮降福穰四時順序兮百穀以昌臣同兆姓兮咸荷恩光